

کوشه باشنده

آیاستفانوس : تشرین ثانی ۱۳۲۸

اسن صوغوق روزگارلرده، کچن سیاه بلوطلرده، صباحلین قویو برافقدن
 قالقان دارغین کونشده، آقشاملری ملول اتکلرینی اطرافه صالیورن ظلمتلرده،
 بوتون مملکتک سمانی تشکیل ایدن شیلرده نکبت و مصیبت، اینن و ماتم یاغدی ران
 بر معنی وار؛ و شیمدی، ایشته نه وقتدن بری دوام ایدن مناظر دهشت و فجاجتدن
 صکره، معنویتمزله بو محیط مصائب آراسنده بر نوع الفت و انسیت حاصل اولدی
 دینه بیلیر. آرتق کورولن شیلر غیر مترقب برر فجیعه، ایشیدیلن شیلر غیر
 منتظر برر بادره دکل؛ غالباً دها قناسنه، دها آجیسنه تصادف ایدلمه مکدن متولد
 برحس ایله، علی العاده زمانلرده انسانک حساسیتی زیر وزبر ایده جک و قوعاتک
 یانندن بر اعتدال لاقیدانه ایله یکیلیور. کویا وقوعات و مشاهدات ایله تأثرلری
 اخذ و تلقی ایدن جلد حساس آراسنده تماسک شدتی تخفیف ایدن بر قشر وار.
 هر کونک حمله تأثراتندن، بوتون بر تاریخک افلاس و انقراضی انقاضندن
 تراکم ایده ایده یوکسلن بیغین، عدسه روتی او یله بویوک بر منظره هائله یه نصب
 نظر ایچون آچمش که آرتق کوزلرده کوچک تفرعاتک اوزرندن آشوب اونلری
 اهل ایدن برتسیب وار. بو حسی بوتون اطرافده، حتی حساسیت خلقدده،
 کورو یورم. دوشن بر قادینک، باییلان بر اختیارک یاننده طویلانوب موقوف
 تأثرات قالان خلقک کوزلری اوکنده بوکون دوشمش قوجه بر مملکتک اولادی
 ایکلیه ایکلیه، سوروکلنه سوروکلنه افواجالم و او یلاسنی کچیررکن او خلق، باشلری
 اوکلرنده، سونوک کوزلری اینمش، اوموزلری قیصیق، آرتق دها زیاده اخذ
 تأثراته قابلیت غائب ایدنلره مخصوص بر رفتار ایله، کویا تللری سرت بر ضربه
 ایله قویمش برکان کبی غیر طنناز قلبی طاشیه رق، سیلنوب کیدیور.
 سلسله مصائبی اکمال ایچون بوتون وسائطه مراجعت ایدن بر قوه قاهره نک
 بر جلوه جدیده سندن، جماعتلرک، اردولرک بر هیولای دهشتدن بحث اولونیور.

کویک نواقصدن مرکب وسائط تجریدیه وتداویسنه براقیلان خسته لره باقیلیرسه بوروایتدن زیاده هفته لرجه دوام ایدن آچلق تجربه لرینک ، مراجعت ایدیلن چاره لرك ، تحمل اولسان محرومیتلرك تأثیراتنه اینانمق دها معقول کورونیور . فقط ها او اولسون ، ها بو اولسون ، سبیلرك فرقی نتیجه یی تغییر ایتمه یور ؛ کویک هواسنده اولومک صوغوق صولوقلرینی حس ایدیورسکز ، و کورمه مک ایچون کوزلرکزی قاباسه کز بیله آکلایورسکز که اطراف کزده هر شینی یونمق ایسته یور مشجه سنه کنیش بر مزار آغزینی آچیور ، و اونک ایچنه متادیا ، بیتمک توکنمک بیلمه یین بر دوام معنده ، دوکولوب یوواردلانیورلر .

..

بوکون ینه زهرلیمک احتیاجیه چیقدم . سوقاقلرده کیمسه یوق ؛ کویک بوتون حیاتی سینهرک چکیلیمش ، یالکز اولومه ترك موقع ایتش ظن اولنه جق . وأولومک کولکه لری کورونیور . آرقه سنده بیرتیق بر قابوطله صیرتی قابارمش بری فرق ایدیلیور که صاللانهرق مجهول بر منزله وصول امیدیه کیدیور ؛ اونه ده باشی صارلمش ، النده بوش طور به یی چکمه یین قولى صارقش بر ایکنجینه تصادف اولونیور که اولرك قابالی پنجره لرندن یول و چاره صوران بر نگاه استمداد ایله کوزلرینی هوالرده کزدریور ؛ سوقاغی دوزکن بر دیکری کورولیور : باجاقلرینک غائب اولمش دولاقلری آلتدن چامورلرله ملمع پاچه لری چیرینه رق صوك قوتلرینی براز دها جابق یورویه بیلیمک ایچون صرف ایدیور .

وبوتون بو تصادف ایدیلن سیالرده بر معنای مشترک وار : تسلیمیت . آرتق نه اولورسه اولسون هر شینی بتیرمک ، هر شینی براقق ، و طاقت بشریه دن بکله نه مه یین بو المارک ، محرومیتلرك ، اضطرابلرك آلتنده ییقلوب یوق اولمق . بو خسته لرك آره سنده هیچ بر نظر کورمه دم که بکا حیات ایله ، حیاتک اذواق ولذا ئذیه استقبالده اومولان بر سعادتک رنگلریله ، حتی ماضیدن قلله بر خاطره تک هجرانیله تقریر تحسیر ایتسین ؛ هیچ بر معنی حس ایتمه دم که اونده ناتمام براقیلیمش بر سرانجام سودانک حسرتی ، اوزاقده قالان بر مسعود یورده ده یاشانه میه جق کونلرك المی ، قارا کلق بر محرومیت ایچنده کجهرک بفته بر بوشلقه منتهی اولان

بر شباک ماتمی اوقونه بیلین . ایچنده بوتون معانی وحشیات دوگمش ، بوتون
امال خولیا سونمش منجمد و مرده بر تسلیمیت .

بویوک جادهیه چیقان یان سوقاقلردن برینی دوزکن بر خستهیه دهاتصادف
ایتدم . قابوٹنک ایچنه صارلمش تیره یور ، ویورو میوردی . اطرافنه باقدی ،
وکویا بش اون خطوه اوتوده بر ذی حیاته تصادف ایتمش اولق ویریله جک قرار
ایچون منتظر بر حادثه ایمشجه سنه بنی کورر کورمز همان اورایه ، سوقاغلک
کوشه سنه چوکدی ، باشنی یره قویدی و کوزلرینی قاپادی .

آرتق یوله دوام ایتک ممکن دکدی . تقرب ایدرک سسلندم ، کوزلرینی
آچهرق دونوق نظریله بکا باقدی وینه قاپادی . اوزمان ماهیت مرضنی آکلامق
ایسته بن بر تجسسله ، وعین زمانده مراجعت ایدیله بیله جک تدبیرلری ذهنأ
آرایه رق ، سؤاللر ایراد ایتدم . هر سؤاله کوزلرینی آچهرق مقابله ایدیور ،
و سویله مکدن اوشه بن ، جواب ویرمه آرتق لزوم کورمه بن بر فتور ایله ینه
کوزلرینی قاپا یوردی .

تنها بر سوقاق ، مسدود أولر باشمک اوستنده آغاجلرک چیللق داللرینی
تیره تن صوغوق وایصلاق بر روزکار ...

یاییله بیله جک شیشی آرایه رق اطرافنه باقیوردم ، باغچه قاپیلرندن بری آچیلدی ،
وألده بر قنجانله اختیار برارمنی چیه رق بزه کلدی .

خسته یه سسلندک : — باق ، سکا قوت ویره جک ، سنی ایصیته جق بر علاج ،
دیدک ؛ بر یودوم ایچسه ک دوارانیرسک اوغلم ...

تکرار کوزلرینی آچدی . کولدیمی ؟ بر جوابی ویردی ؟ صولوق وایچه
دوداقلرینک اوزرندن بر کولکه کچور کیدی .

اوزمان اختیار آدمله یکدیگر مزک رأینی آلمق ایسته یورمشجه سنه باقیشدق ،
او بکا دیدی که : — اقدی ، سزه بو قنجان ویرسه م ، سز اونک باشنده
بکله سه کز ؛ بنده شوراجفه قدر آتلاسه مده بوایشک مأمورلرینی بولسه م ...
المی اوزاته رق قنجانی آلدیم . نه قدر بکله دم ؛ بیلمه یورم . آره صره علاجی

تکلیف ایدیوردم ، او آرتق کوزلرینی ده آچایوردی . اوزون اوزون بوکنج آدمی تدقیق ایتدم :

یکرمی ایکی یاشلرنده کورونیوردی ، اینجه صاری بیقلری ، یاری آجیق دوداقلرینک اراسنده بیاض و دوزکون دیشلری واردی . کوچک و جلیز وجودی ، سیاهنک بوتون نارینلشمش خطوطی اوکا هنوز برچوجق اقامه سی ویریوردی ، و او یله ظن ایتدم که قابلی کوزلرینک اینجده ، اونلرک سونمش افقده یالکنز برخیال وار : برخیال شفقت و مرحمت . او یالکنز اونی کوریور ، اونی بکله یور ، اونی ایسته یوردی . اوخیال ، بوغریب کویک تنها کوشه سنده یاوروسی اولن او آنه خیالی ، اوده النده بر قنجان علاجه ، فقط صحت و عافیت کتیرن ، امید و تسلیت و یرن ، و « سن بکا لازمسک ! » دیمک ایستر بر نظرله یو اولومه تسلیم اولان چوجنی یکیدن حیاته اعاده ایدن بر علاجه دولاشیوردی .

نهایت کلدیلر . اختیار آدم اوکده ، برازعجه یورو به رک ، دلالت ایدیوردی . اونلر ، ایکی نفر برماندا ارابه سیله آرقه دن یواش یواش کلیورلردی .

خسته نک یاننده دوردیله . آراضده برکله تعاطی اولونمادی ؛ او ایکی نفر بک آیشلشمش بر ایش کورنلره مخصوص بر امنیت حرکته ایلریله رک ، بری اوموزلرندن دیکری ایاقلرندن ، خسته نی طوتدیله . اونک تکرار کوزلری آچیلدی ، آرابه یی کوردی ، غالبا : — دها بیتمه مش ! دیدی و کوزلرینی یه قاپادی .

آرابه یه یاتیردقلری زمان خسته اللریله قارتی باصه رق یه قیوریلدی ، نفرلردن بری ماندالرک ایینی چکدی ، دیکری : — شیمدی اونه کیلری آله لم ! دیدی .

اوزمان اختیار آدم بکا خبر ویردی : — اورادن بورایه قدر اوچ دانمه ده راست کلدک . هپده بویله کوشه لره یاتمشلر . دیدی .

عشاقی زاده : خاله ضیا